




ՄԱՅՐ ԱԹՈՒՈՒՄ

Նոյեմբերի 19-ին, երբ Վարչավայում տեղի էր ունենում խաղաղության կողմնակիցների Համաշխարհային երկրորդ կոնֆերանսը, Մայր Տաճարում մատուցվեց մաղթանք խաղաղության գործի հաջողության համար: Մաղթանքին ներկա էին էջմիածնից և Երեւելանից եկած հավատացյալներ: Մաղթանքին բարեհաճել էր ներկա գտնվել Վեհափառ Հայրապետը: Հավուր պատշաճի քարոզ խոսեց Գերաշնորհ Սահակ Մ. Վարդապետը: Քարոզը լսվեց մեծ ուշադրությամբ և արժանացավ Վեհափառ Հայրապետի գոհունակությանը:

Նոյեմբերի 29-ին՝ Հայաստանում Սովետական կարգերի հաստատման 30-րդ տարեդարձի առթիվ, Մայր Տաճարում տեղի ունեցավ մաղթանք: Մաղթանքի հանդիսադիրն էր Գերաշնորհ Տեր Վահան Արքեպիսկոպոսը, որը և քարոզեց այն վերելքի մասին, որը Հայաստանը նվաճել է 30 տարվա ընթացքում, Սովետական կարգերի շնորհիվ:

Նույն օրը, երեկոյան, Ճեմարանի հանդիսասրահում տեղի ունեցավ երեկույթ՝ Հայաստանում Սովետական կարգեր հաստատվելու 30-րդ տարեդարձի առթիվ: Հրավիրված էին հյուրեր թե՛ Երևանից և թե՛ էջմիածնից: Երեկոյան ունեցան Ճեմարանի վերատեսուչ Մ. Մինասյանը, դասախոսները, ուսանողները: Եղան խմբական երգեր և մեներգներ, նվագաժողովուրդ և պարեր:

Հանդեսը փակվեց Վեհափառ Հայրապետի եզրափակիչ խոսքով և օրհնությամբ: Հյուրերը հրավիրվեցին թեյասեղանի:

Դեկտեմբերի 21-ին Ճեմարանի հանդիսասրահում տեղի ունեցավ Մայր Աթոռի միաբանության, դասախոսների, ուսանողների և աշխատակից-ծառայողների հանդիպումը քաղաքային Սովետի դեպուտատության թեկնածու Զաքարյանի հետ:

Հանդիպման առթիվ ելույթ ունեցան Ճեմարանի վերատեսուչ Մ. Մինասյանը, Սահակ Մ. Վարդապետը, Գ. Լսարանի ուսանող Իգնատիոս սարկավագ Մարտիրոսյանը և ուրիշները:

Դեկտեմբերի 24-ին, քաղաքային և շրջանային սովետների դեպուտատներ ընտրելու համար, Սուրբ Պատարագից հետո, ամբողջ միաբանությունը, Ճեմարանի ուսուցչական կազմը, ուսանողները, աշխատակիցներն ու ծառայողները դնացին ընտրական տեղամասը քվեարկության:

Վեհափառ Հայրապետի փոքր ինչ հիվանդության պատճառով, քվեատուփը բերվեց Վեհարան: Վեհափառի քվեարկությունը տեղի ունեցավ Վեհարանում:

Մայր Տաճարի ավագ դասապետ Տեր Նիկողոս ավագ քահանա Բավեյանը Երևանում վիրահատության ենթարկվելով, կատարելապես ապաքինված, ողջ առողջ վերադարձավ Մայր Աթոռ, հուրախություն Մայր Աթոռի միաբանության և հավատացյալ ժողովրդի:

